

# SLUŽBENE NOVINE

Utorak, 21. januara 2003.

KANTONA SARAJEVO

Broj 1 - Strana 5

Ministarstvo za rad, socijalnu politiku,  
raseljena lica i izbjeglice

Na osnovu člana 40. Zakona o kantonalnoj upravi ("Službene novine Kantona Sarajevo", broj 20/01), a u vezi sa čl. 25., 26., 30., 40., 41., 63., i 119. do 122. Zakona o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 16/02), ministrica Ministarstva za rad, socijalnu politiku, raseljena lica i izbjeglice, donosi

## PRAVILNIK

### O POSTUPKU I NAČINU RADA ORGANA MEDICINSKOG VJEŠTAČENJA U VEZI SA OSTVARIVANJEM PRAVA IZ OBLASTI SOCIJALNE ZAŠTITE I ZAŠTITE CIVILNIH ŽRTAVA RATA

#### I - OPĆE ODREDBE

##### Član 1.

Ovim pravilnikom se utvrđuje: vrsta nalaza, ocjena i mišljenja donesenih od strane stručne institucije za sve korisnike prava po Zakonu o socijalnoj zaštiti, zaštiti civilnih žrtava rata i zaštiti porodice sa djecom ("Službene novine Kantona Sarajevo", broj 16/02) (u daljem tekstu: Kantonalni zakon); definicija te ocjene, pokretanje postupka ocjene i potreban minimum medicinske dokumentacije za ocjenu; postupak ocjene u Stručnoj instituciji za ocjenjivanje radne sposobnosti.

##### Član 2.

Stručna institucija koja obavlja poslove iz člana 1. ovog pravilnika je JU "Zavod za medicinu rada Kantona Sarajevo (u daljem tekstu: Stručna institucija).

#### II - NALAZI, OCJENE I MIŠLJENJA

##### Član 3.

Stručna institucija, u skladu sa zakonom, za sve korisnike prava po istom, donosi slijedeće nalaze, ocjene i mišljenja:

1. Nalaz, ocjenu i mišljenje o nesposobnosti za rad podnosioca zahtjeva (odraslih osoba i djece);
2. Ocjenu i mišljenje o potrebi njege i pomoći od strane druge osobe (odrasle osobe i djeca);

3. Ocjenu o potrebi za njegom i pomoći u kući;
4. Ocjenu o mogućnosti osposobljavanja za rad, profesionalnoj rehabilitaciji, prekvalifikaciji i dokvalifikaciji (odraslih osoba, djece ometene u fizičkom i psihičkom razvoju i civilnih žrtava rata);
5. Ocjenu o potrebi smještaja djece na dnevni boravak ili internatski smještaj, radi osposobljavanja za život i rad;
6. Ocjenu o visini stepena (procenta) tjelesnog oštećenja-in- validiteta;
7. Ocjenu o potrebi za ortopedskim dodatkom;
8. Ocjenu o nesposobnosti za privređivanje člana porodice;
9. Ocjenu o nastavku liječenja.

#### Član 4.

Ocjene iz člana 3. Pravilnika, Stručna institucija donosi u prvostepenom postupku i po žalbi u drugostepenom postupku.

### III - DEFINISANJE OCJENE

#### Član 5.

Ocjena iz člana 3. pravilnika mora se precizno izraziti slijedećom definicijom:

1. a) Postoji potpuna nesposobnost za samostalan rad i privređivanje;
- b) Ne postoji potpuna nesposobnost za samostalan rad i privređivanje;
- c) Postoji potpuna nesposobnost za samostalan život i rad od prije navršene 15 godine života;
- d) Ne postoji potpuna nesposobnost za samostalan život i rad od prije navršene 15 godine života.
2. a) Postoji potreba za pomoć i njegu od strane druge osobe, PRVOG STEPENA (član 28. Zakona);
- b) Postoji potreba za pomoć i njegu od strane druge osobe DRUGOG STEPENA (član 29. Zakona);
- c) Postoji potreba za njegom i pomoći od strane druge osobe zbog promjena u zdravstvenom stanju koje nisu posljedica ometenosti u fizičkom ili psihičkom razvoju (član 26. Zakona);
- d) Ne postoji potreba za njegom i pomoći od strane druge osobe.

3. a) Postoji potreba za njegom i pomoći u kući (ukoliko osoba ispunjava kriterije iz člana 28. tač. a, b. i c. Zakona);

b) Ne postoji potreba za njegom i pomoći u kući.

4. a) Postoji potpuna nesposobnost za samostalan život i rad od prije navršene 15. godine života, a obzirom na vrstu i prirodu oboljenja može se osposobiti pod specijalnim uvjetima (školovanju) u odgovarajućem zanimanju (upisati zanimanje) u trajanju od četiri godine;

b) Postoji mogućnost osposobljavanja putem prekvalifikacije, odnosno dokvalifikacije za posao (upisati vrstu posla), pod specijalnim uslovima u trajanju do četiri godine;

c) Ne postoji mogućnost osposobljavanja putem profesionalne rehabilitacije.

5. a) Postoji potreba za smještajem na dnevni boravak ili internat;

b) Ne postoji potreba za smještajem na dnevni boravak ili internat.

6. a) Ocjena stepena (procenta) tjelesnog oštećenja podnosioca zahtjeva za korištenje prava civilnih žrtava rata vrši se po: Zakonu o osnovnim pravima ratnih vojnih invalida i porodica palih boraca i Pravilniku o utvrđivanju vojnog invaliditeta sa definicijama utvrđenim u Pravilniku, Listi procenta vojnog invaliditeta, članu 65. Zakona o osnovama socijalne zaštite, zaštite civilnih žrtava rata i zaštite porodice sa djecom ("Službene novine Federacije BiH", broj 36/99) i članu 120. Kantonalnog zakona.

b) Potreba za njegom i pomoći od strane druge osobe za civilne žrtve rata utvrđuje se na način propisan Pravilnikom o medicinskim indikacijama za razmatranje vojnih invalida od I do IV grupe prema stepenu potrebe za njegom i pomoći od strane druge osobe i grupi vojnog invaliditeta, te članom 60. federalnog zakona.

7. a) Ortopedski dodatak se utvrđuje po Zakonu o osnovnim pravima ratnih vojnih invalida i porodica palih boraca i Pravilniku o oštećenju organizma po osnovu kojeg vojni invalid ima pravo na ortopedski dodatak i razvrstavanje tih oštećenja u stepene.

8. a) Postoji potpuna nesposobnost za privređivanje (civilne žrtve rata);

b) Ne postoji potpuna nesposobnost za privređivanje (civilne žrtve rata).

9. a) Liječenje nije završeno:

- utvrđuje se kada se smatra da dosadašnjim liječenjem, odnosno mjerama medicinske rehabilitacije nisu iscrpljene sve mogućnosti, odnosno kada se očekuje da se daljim liječenjem ili mjerama medicinske rehabilitacije može uspostaviti radna sposobnost. Potrebno je dati jasne preporuke o načinu daljeg liječenja ili medicinske rehabilitacije.

#### IV - POKRETANJE POSTUPKA OCJENE I POTREBAN MINIMUM MEDICINSKE DOKUMENTACIJE ZA OCJENU

##### Član 6.

Postupak ocjene za korištenje prava utvrđenih federalnim i kantonalnim zakonom pokreće JU "Kantonalni centar za socijalni rad" - Služba socijalne zaštite (u daljem tekstu: Centar) ili općinska služba uprave na čijem području podnosilac zahtjeva za korištenje prava ima prebivalište, odnosno boravište.

#### Član 7.

Centar ili općinska služba uprave pokreće postupak ocjene dostavljanjem pismenog zahtjeva za ocjenu Stručnoj instituciji.

#### Član 8.

Zahtjev iz člana 7. ovog pravilnika mora da sadrži:

- ime, očevo ime i prezime,
- spol,
- dan, mjesec i godinu rođenja,
- broj lične karte,
- jedinstveni broj građana, ukoliko je osoba punoljetna,
- adresu prebivališta,
- da li je ranije vršena ocjena,
- koja se vrsta ocjene traži (šta treba utvrditi ocjenjivanjem).

#### Član 9.

Podatke o zahtjevu popunjava Centar ili općinska služba za upravu i odgovorni su za tačnost istih.

#### Član 10.

Uz zahtjev za ocjenu dostavlja se:

1. Za ocjenu nesposobnosti za privređivanje člana porodice i ocjenu o mogućnosti osposobljavaja za rad, profesionalnoj rehabilitaciji, u prekvalifikaciji i dokvalifikaciji (djece ometene u fizičkom ili psihičkom razvoju i civilnih žrtava rata) klinički nalazi, specijalistički nalazi, nalazi ordinirajućeg ljekara, nalaz i mišljenje Komisije za kategorizaciju i drugi nalazi koji omogućavaju pomoć u donošenju objektivne ocjene;

2. Za ocjenu o potrebi njege i pomoći od strane druge osobe dostavlja se medicinska dokumentacija koja je potrebna za ostvarivanje prava na njegu i pomoć druge osobe.

Slabovidne osobe dostavljaju dokumentaciju o potrebi za ortopedskim dodatkom, izvornu medicinsku dokumen- taciju o ranjavanju i liječenju, odnosno dokumentaciju o nastanku bolesti i liječenju, te nalaze o sadašnjem zdravstvenom i funkcionalnom stanju.

3. Za ocjenu o visini stepena (procenta) tjelesnog oštećenja i ocjenu o potrebi za ortopedskim dodatkom, izvornu medicinsku dokumentaciju o ranjavanju i liječenju, odnosno dokumentaciju o nastanku bolesti i liječenju, te nalaze o sadašnjem zdravstvenom i funkcionalnom stanju.

## V - POSTUPAK OCJENE U STRUČNOJ INSTITUCIJI

### Član 11.

Nakon prijema zahtjeva za ocjenu od strane Centra ili općinske službe za upravu, Stručni tim formiran u Stručnoj instituciji (u daljem tekstu: Stručni tim), utvrđuje:

- da li je dokumentacija koja je priložena uz zahtjev valjana i potpuna,
- da li je zahtjev za ocjenu precizan i jasan,
- da li se radi o zahtjevu za prvostepenu ocjenu ili je u pitanju žalba na već izvršenu ocjenu.

### Član 12.

Ukoliko Stručni tim utvrdi da se na osnovu podnesenog zahtjeva i priložene dokumentacije ne može izvršiti ocjena, zatražit će dopunu dokumentacije i spis sa prijedlogom za dopunu iste, vratiti Centru ili općinskoj službi za upravu koji je podnio zahtjev za ocjenu.

### Član 13.

Kada Stručni tim utvrdi da su zahtjev za ocjenu i dokumentacija priložena uz zahtjev, valjani i potpuni, određuje dan ocjene i pregleda i o tome obavještava podnosioca zahtjeva (Centar ili općinsku službu za upravu).

### Član 14.

Kada pozvano lice pristupi na ocjenu, Stručni tim vrši identifikaciju lica koje je pristupilo ocjeni, razmatra medicinsku i drugu dokumentaciju priloženu uz zahtjev, te vrši pregled pozvanog lica.

### Član 15.

Na osnovu neposrednog pregleda i medicinske dokumentacije, Stručni tim donosi nalaz, ocjenu i mišljenje u prvo- stepenom postupku.

Ukoliko se radi o žalbi na već donesenu ocjenu, Stručni tim donosi nalaz, ocjenu i mišljenje u drugostepenom postupku i izjašnjava se o pravilnosti ocjene donesene u prvostepenom postupku.

### Član 16.

Ako se iz priložene medicinske dokumentacije može nedvojbeno utvrditi da se radi o osobi čije je zdravstveno stanje takvo da se ne može odazvati na pregled, pregled će se izvršiti u kućnoj posjeti.

### Član 17.

Nalaz, ocjena i mišljenje koju daje Stručni tim mora biti potpun, jasan i mora sadržavati sve elemente potrebne za donošenje rješenja o ostvarivanju, odnosno neostvarivanju prava utvrđenih federalnim i kantonalnim zakonom.

#### Član 18.

Nalaz, ocjenu i mišljenje u prvostepenom i drugostepenom postupku, Stručni tim daje na obrascima koji su sastavni dio ovog pravilnika (Obrazac br.1.).

#### Član 19.

Nakon završene ocjene jedan primjerak nalaza, ocjene i mišljenja se ulaže u spis i zajedno sa spisom dostavlja Centru ili općinskoj službi za upravu koji su podnijeli zahtjev za ocjenu.

Jedan primjerak se arhivira i čuva u JU "Zavod za medicinu rada Kantona Sarajevo".

### VI - PRELAZNE I ZAVRŠNE ODREDBE

#### Član 20.

Ovaj pravilnik stupa na snagu danom njegovog donošenja, a objavit će se u "Službenim novinama Kantona Sarajevo".

#### Član 21.

Stupanjem na snagu ovog pravilnika, prestaje da važi Pravilnik o načinu, postupku i načinu rada medicinskog vještačenja u vezi sa ostvarivanjem prava iz oblasti socijalne zaštite i zaštite civilnih žrtava rata ("Službene novine Kantona Sarajevo", broj 21/00).

Broj 13-01-49-24695-1/02  
30. decembra 2002. godine  
Sarajevo

Ministrica  
**Besima Borić**, s. r.